

Ma pié una rova tant descaussa,
 E abandonè così Gervas;
 Giust com' s' i fuss monea faussa,
 L'è lo ch' i peus pa demne pas.
 Coust l'è un afront! cos' aine fate!
 Ma dimlo ampoch li tut ariond,
 I t' eu pa gnanca galufrate
 La toa pitansa da sul tond.
 Mia nona m' ha sempre avertime
 D' lassè 'l fumlam ch' a l' era mei,
 Prehè m' avrio mach tradime,
 L'è bel avans bin pur trop vei.
 Ma i veui giughè tre lire d' toma
 Ch' a j' vnirà un dì ch' i t' m' sercras,
 E mi t' voltreu 'l pi bel d' Roma,
 Così sarà to dan peui si t' gratras.

Dialogo tra due Fratelli, uno de' quali
 non vuol travagliare.

CANZONE XXVIII.

O via sbrighite, Gian Matè,
 Vastu ancor nen a travajè?
 Astu forse l' sparm ados
 Ch' la fatiga t' rompa j' os?
 Astu forse l' sparm ados
 Ch' la fatiga t' rompa j' os?
 Cosa tenstu parlà d' guai
 Tut 'l dì con to travai?
 Smijlo pa ch' i sia vendù
 Pr la pel e pr 'l mnù!

I lo sai ch' a l' è già un pes,
 Ch' i t' ses un gargas e mes;
 I t' vorie mach fè l' sgnor,
 E ch' ai fuss pa un di d' lavor.
 Senti un poch che tajalargh,
 Dislo pa ch' i son un gargh!
 Fa pa tant 'l ciacion,
 Ti ch' i t' ses 'l prim poltron.
 T' as rason brut cëcapoi,
 Tira 'l bocc, ch' a l' è to d' doi,
 I t' ses pro dij pi spedient
 Pr fè travajè i to dent.
 I t' m' rompe già i garat
 Pr cantetlo ciair e nat,
 A m' ven già la stissa al nas,
 Lasmè stè, furnisla, e tas.
 I sai pro to sentiment,
 Ch' a l' è d' vive a tradiment,
 Aine mi da fè 'l fachin
 Pr mantni to bel bochin?
 A m' n' amporta pa un patach,
 Mi veui pa buteme a bsach;
 I son pa così bagai
 Da masseme ant 'l travai.
 Fassa d' manch d' travajè
 S' i t' as veuja d' sgrufiè;
 S' no fa cont, me bel tabus,
 D' andè crostionand a j' us.
 Pataloch, cos' astu ti
 Da crussiete pr loli?
 An tal cas j' androma ansem
 Quand i sio a coul estrem.
 Va ti sol, mostas da can,
 Mi m' guadagno pro me pan,
 Ma pr ti t' as da cherpè
 Ant un fos o s' un liamè.

I t' farie mei, gamacc,
 Si, a la fè, i t' steisse cacc,
 S' a fuss nen ch' i soma frei,
 I t' avria già sciancà i cavei.
 I t' ai già arnonssià da frel,
 Testa d' aso e da crivel,
 Stame pa, toch d' animal,
 A nominè mai pi pr tal.
 O via, dame mia porsion,
 E vnoma a na division:
 L' è sigur che tra noi doi
 I faroma mai bon coi.
 Vate piè la toa porsion
 Su le giaire del Sangon,
 I t' as già mangiala almanch
 Dodes vote pi che d' manch.
 La mia part, messè Pancras,
 I la veui fin ant un stras;
 T' as bel di, bel ciacotè,
 T' as da fè con Gian Matè.
 Bin ch' i t' sie così trist,
 T' ses pa gnanca l' Anticrist?
 Fa pur lo ch' i t' savras,
 Mi m' n' amporta pa 'n spuas.
 J' eu tant cheur e tant bon front,
 Ch' i m' fareu pro dè me cont;
 I t' vedras a to dispet,
 Ch' i m' seu fè portè rispet.
 Astu ancor nen pro ciancià?
 Oh che lenga da stropià!
 I t' m' as fait gonfiè 'l savel,
 Giumai gros com' un tinel.
 T' as bel esse un marochin,
 T' m' fas pa basè 'l babuin;
 Elo giust ch' i leca 'l mon?
 I m' fareu pro fè rason.